

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

STESEN MINYAK DAN SEBUAH TAPAK PEMBINAAN DISYAKI MELAKUKAN AKTIVITI PENYELEWENGAN MINYAK DIESEL BERSUBSIDI DISERBU PENGUAT KUASA KPDNHEP

PUTRAJAYA, 23 Februari 2022 – Kementerian Perdagangan Dalam Negeri dan Hal Ehwal Pengguna (KPDNHEP) berjaya menumpaskan aktiviti penyelewengan minyak diesel bersubsidi dalam dua siri serbuan yang dilakukan ke atas sebuah stesen minyak yang beralamat di Jalan Pintasan Dengkil - Putrajaya, Dengkil, Selangor dan di sebuah kawasan tapak pembinaan yang terletak bersebelahan dengan stesen minyak tersebut yang disyaki menjalankan aktiviti penyelewengan minyak diesel bersubsidi.

2. Serbuan yang bermula pada jam 9.00 pagi itu dengan kekuatan seramai sembilan (9) anggota Penguat Kuasa daripada KPDNHEP Putrajaya hasil risikan yang telah dilakukan oleh pihak KPDNHEP sejak sebulan yang lalu. Ketika serbuan yang dilakukan ke atas stesen minyak tersebut, terdapat sebuah lori yang telah diubahsuai sedang mengisi minyak diesel bersubsidi di salah sebuah pam stesen minyak berkenaan.

3. Hasil pemeriksaan lanjut mendapati, minyak diesel yang diisi ke dalam tangki yang telah diubahsuai pada lori berkenaan disyaki disambungkan/disalurkan terus ke sebuah tangki di kawasan tapak pembinaan terbabit melalui saluran separa kekal bawah tanah yang

menghubungkan antara tangki lori berkenaan kepada sebuah tangki lain yang terletak di dalam kawasan tapak pembinaan terbabit.

4. Hasil serbuan yang telah dilakukan, pasukan serbuan telah mengambil tindakan dengan menyita sejumlah 64,400 liter minyak diesel daripada dua (2) buah tangki masing-masing terletak dalam bawah tanah di stesen minyak berkenaan dan sebuah lagi di dalam kawasan tapak pembinaan tersebut, sebuah lori berkapasiti empat (4) tan, saluran paip getah, sebuah *compressor*, satu set dekoder CCTV dan invois/resit jualan berserta dokumen perniagaan yang lain bagi tujuan siasatan lanjut. Nilai keseluruhan rampasan dianggarkan berjumlah RM 178, 347.85.

5. Dua (2) individu lelaki warga tempatan masing-masing berumur 35 tahun yang mengaku sebagai pengurus dan penyelia tapak pembinaan berkenaan turut ditahan bagi membantu siasatan.

6. Kertas siasatan telah dibuka dan siasatan lanjut terhadap kes ini akan dilakukan di bawah Akta Kawalan Bekalan 1961 bagi mengenalpasti rangkaian pengedaran minyak diesel tersebut bermula dari stesen minyak ke tapak pembinaan seterusnya ke peringkat pembeli.

7. Jika sabit kesalahan boleh didenda tidak lebih RM 1,000,000.00 (Ringgit Malaysia Satu Juta) bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat

sekiranya sabit kesalahan boleh didenda tidak melebihi RM 3,000,000.00 (Ringgit Malaysia Tiga Juta).

8. Kementerian juga akan mengambil tindakan tegas dengan menggantung sementara lesen berkaitan barang kawalan oleh syarikat yang terlibat sehingga siasatan selesai dijalankan.

9. Selain itu, syarikat ini juga akan disiasat di bawah Seksyen 4 Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2011) (Akta 613) iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil pendapatan atau harta yang dijana daripada aktiviti haram penyelewengan barang kawalan bersubsidi terutamanya berkaitan minyak diesel ini.

10. Jika disabitkan dengan kesalahan di bawah Akta 613 ini boleh dipenjarakan selama tempoh tidak melebihi lima belas (15) tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

11. KPDNHEP ingin memberikan amaran keras kepada semua pengusaha/peniaga dan menegaskan bahawa Kementerian tidak akan berkompromi dengan mana-mana pihak yang didapati terlibat dalam sindiket dan aktiviti haram ini. Tindakan tegas akan di ambil termasuk mendakwa

mereka di Mahkamah berdasarkan peruntukan undang-undang di bawah Akta Kawalan Bekalan 1961.

12. Orang ramai mempunyai maklumat berhubung aktiviti penyelewengan barang kawalan dan bersubsidi ini bagi memastikan aktiviti penyelewengan barang kawalan dan bersubsidi ini dapat dibanteras sehingga ke akar umbi yang boleh mendatangkan kesan buruk kepada rakyat dan Negara.

13. Orang ramai yang mempunyai maklumat berhubung penyelewengan barang kawalan dan bersubsidi ini boleh menyalurkan aduan kepada pihak Kementerian melalui saluran berikut:

- i. WhatsApp 019-279 4317
- ii. Portal Aduan; e-aduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my
- v. Ez ADU KPDNHEP

Azman bin Adam
Pengarah Penguat Kuasa
Kementerian Perdagangan Dalam Negeri
dan Hal Ehwal Pengguna
PUTRAJAYA,

23 Februari 2022

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan niaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :



